

तीतसलाई

पावलए परींद ओयो चिथी

आव चिथी तीतसलाई पावलए परींद ओयो ज़। तीतस पावलस सिप सिप दुलिद परमेस्वरए ओपाँ सथैज़्याव मिं ओल्यो। पावलए नोलाई 'गेभाइ ज़' (२ कोरिन्थी २:१३), 'डास सिप येन दोज़्याव डानैँ ज़' (८:२३), सोनो 'परमेस्वरए ओपाँत उयुँ हुबो साचो डाज़ा ज़' (तीतस १:४) है ओदोज़्याव। पावलए नोलाई क्रेत तापुत माखेमो नियेनर खेम्या सोनो मन्दलीलाव लोम्बार खतैन्याए जूनी ख्यानैक्यो (१:५)। है जैद आव चिथी धुतनी पैज़्यावराए ल्योनी जोगोइन्या (१:१०-१६) सोनो परमेस्वरए ओपाँत बाज़्यावर किताव ताव उपरिज़्याव पैन्याए जूनी (२:१-३:२) परींदिक्यो।

१ डा पावल, परमेस्वरए ओबाँदा, परमेस्वरए ओराछाँतिउरालाई साचो पाँलाई थ-रैदचाद ओल उयुँलाव मितावर जैन्याए जूनी येसु ख्रीसए ओसाची खतैसिउ डालिज़्या। २ननी ज़ परमेस्वरए ड़ादाकिन ज़ 'अजम्बरी जुनी ड़ाराएरिज़्या' है ओरादोवदा यायुँ थू जैरिज़्यार। है जैद खर्क ज़ धुत मापाँज़्याव परमेस्वरए, ३ओल ओगोइँव बेलाक ज़ नो ओपाँ भरी

सतैक्यो। डा फरी नो पाँ सथैन्यात ओल गेलाई बाँचैज़्याव परमेस्वरए है ओदाँवनी ज़ डाताके।

४नँ डास सिप परमेस्वरए ओपाँत नयुँ हुबो साचो डाज़ा तीतस-लाई आव चिथी परींद डाईज़्या। नल्योदा परमेस्वर गेबाबु सोनो गेलाई बाँचैज़्याव येसु ख्रीसनी नियुँ ओगराँक, नयुँ ब होलाँ जैद उईँनिक।

मन्दलीलाव लोम्बार

५डा नँलाई क्रेत तापुताव माखेमो गिनयेनर खेम्याए जूनी सोनो नाखार नाखारल मन्दलीलाव लोम्बार खतैन्याए जूनी डाख्यानैनिके। हो बेलाकाव है डादीव मिताव, ६नो लोम्बार नराजैक याखत माल्योर, याज्या ब नेज्या माल्योर, याजार ब परमेस्वरए ओपाँत हुव यामन लागिउदा माबाद याबाबुलाई खिउर ओतारक। ७नो लोम्बा ताव मिँ परमेस्वरए ओयेन दान्या ओतावए कान्त ज़ ओपाँ:च्या माल्यो ताव परिके। है जैद नो मिँ एकोहोऱ्यासो, हतप्त उरिस चोन्या, मद छोकोरात ड़मो, ड़सिन्या, प्राडँत लोभ दान्या, निताव ओपाँ:च्या ल्यो ताताक। ८बुरू नो मिँ पाहुनार समारिन्या, चाव बानी खिम्या, ओतहस ल्यो, प्राडँत ज़ सतस दाज्याव, थोरिउ युँ ल्यो, परमेस्वरए उर्युँलाव मिताव ओताक। ९नो मिँए ओपैसिउ मिताव युँ हुबो परमेस्वरए ओपाँ माबिरैद, नो पाँनी ज़ छुतरालाई यासा हाइदचाधुन्या, धुतनी पैज्यावरालाई यागल्ती थरैदचाद यापाँ वैंधुन्या ब ओताक।

फातैज्यावरास जोगोइसिन्या

१०नल साचो पाँकिन तँदा जैसि-ज्यावर कुधु ज़ लिज्यार। नोराए

यापाँ अनाकलाव ससैसिउ ओतावए मिँरालाई फातैन्या वाज़ लिज्या। भन प्राइरानी फातैज्यावर नो क्यालन्या सरस 'माजैसिद माताए' है लिज्यावर ज़ लिज्यार। ११नितावराए यापाँ वैदचाव ताके। नोराए पैसाए लोभए माचाहिउ पाँर वै वै जैद तोबो फ़िमलावरालाई ब याराफातैज्यार। १२नो क्रेतलाव उमिन थासो जैसीए ब, "आव गेपोलाव मिँर छुलैँ पुलैँ दाज्यावर, छे छे ड़म्सिउ धुइज्यासोर, येन मादाद ज़्यान्या हाम्पातीर वाज़ लिज्यार," है लिद ले। १३नोए है उलिज्याव मिताव साचो ज़ लिज्या। है जैद नँ तीतस नलाव मिँरालाई बनै ज़ हफ़कैद परमेस्वरए ओपाँत थोरिउ जैव ताके। १४परमेस्वरए साचो ओपाँकिन तँदाडावराए याससैव अनाकलाव यापाँ सोनो यहूदीराए यासिजैज्याव आगल्या पाँदा यार्युँ ताभा:रक। १५परमेस्वरए ल्योनी यार्युँ छैँव मिँरालाई प्राइँ चोखो ज़ लिज्या। परमेस्वरए ओपाँत यार्युँ माहुबो यार्युँ माछैँवरालाई ते चोखो काता ज़ माले। याबुद्धी भरी ब छैँव काता ज़ माताद कप्तैँ वाज़ लिज्या। १६याया:ए ते 'परमेस्वरलाई गेसरेस्ज्या' है ल्यो जैसिज्यार, यायेननी ते परमेस्वरलाई यामासरेस्ज्याव ज़ रै:ज्या। नोर परमेस्वरए ओपाँ माभै:द युँ माजामो काम मालागिउर ज़ ताज्यार।

परमेस्वरए ओपाँस खैन्या येन

२ नँ भन्या थ०रिउ पाँलाई ओज्यास-
ज्याव मितावनी पैव ताके।
२सेरो मिँर माचावदा माङमोर, यामान
नैदचान्या स्यासोर, यातहस ल्योर,
परमेस्वरए ओपाँत थ०रिउर, नँ मेंए
ल्योदा युँ थू जैद प्राईँ सहिन्या ताव
परिके लिद यासम्जैयो।

३हो मिताव ज़ जूचासोर ब
यादोज्याव येन भरित याधर्म रैं:वर
ओतारक। अर्काए उछींनी मापाँन्यार,
मद छोकोरात माङमोर, छुतलाई चाव
येन सिऊधुन्यार ओतारक। ४नोराए
भर्जाकाव मेंमारालाई ब यारेरास
खैन्या, याज़ारालाई पाथस नैन्या
ओरासिऊरक। ५हो वाज़ मा:क, नो
धामें मेंमार यातहस ल्योर, यारेराए
सतत ल्योर, याफ़िम चावस चलैन्यार,
यायुँ गराँवर, यारेराए पाँ धूँल ल्योर
ओतारक। हो ताकिन ची परमेस्वरए
ओपाँत पाँ:च्या हुन्या माले।

६हिताव ज़ भर्जाकाव खेपार ब
प्राईँत ज़ यातहस ल्योर ओतारक।
७नँ फरी नोराए याङाक चाव येन
दान्यात सतैद नैसिउ मिताव तानी।
परमेस्वरए ओपाँलाई बरे:सी त्रिन्या
माजैद, माबिरैद ज़ लाँव ताके। ८नपाँ

भरी थ०रिउ, कान्त ज़ ओखत माल्यो
ओताक। हो ताकिन ची गेकिन
तँदाडावराए गेक्याँत काता खत ज़
मादैद याज़ थाम थुम तान्या लेर।

९फरी नँ नो बाँदा लिज्यावरालाई है
यादोयो, नोर यासाहुराए पाँ धूँल लिद
मारूम्रूमैद यासाहुराए युँलाव मिताव
येन दान्या ओतारक। १०यासाहुराए
मीं काता ज़ माछापद यादोज्याव
भरित सतस दान्यार ओरै:रक। निताव
यायेनए गेलाई बाँचैज्याव परमेस्वरए
ओपाँए ओसोभा हाइदचान्या लेर।

परमेस्वरए ओअसिक

११परमेस्वरए गेल्योदा उयुँ गराँद
अजम्बरी जुनील बान्या प्राईँ मिँराए
गेजूनी रैं:द ले। १२परमेस्वरए निताव
ओअसिक गेक्याँत उहुवए गे
परमेस्वरकिन तँदाडाव गेमन लागिउ
येन भरी रास्द, आव पापी जुकल
तहस लिद परमेस्वरए उयुँलाव
मिताव चाव येन दान्यादा गेयुँ थू
जैद गेसिऊसिज्या। १३सोनो माहान
गेपरमेस्वर, गेलाई बाँचैज्याव येसु
ख्रीसए ओज़गै मगैस ओमाहुवा पै
आस दाद ओयेम चिऊव ज़ गेनैज्या।
१४नो गेप्रभु येसु ख्रीसए गेलाई पापनी
हाइद ओल छैँव उमींर सोनो ओयेनत

युं थू जैन्यार जैन्याए जूनी उजिउ
भाःदद्यासिक्वो।

१५ नँ आव है डादीव पाँर पैद
परमेस्वरए ल्योनी नदैव हकनी
रूवारालाई यासम्जैयो, रूवारालाई
यासिडाज्यो। सुए ज़ नपाँ सज़िम्द
ताईरक।

परमेस्वरए उयुं ग़ालो

३ है जैद नलावर सरकारए
ओकानुन चलैल्या हक दैवराए
याधूँल लिद मुइलिउर ताद प्राइँलाई
तान्या येन ओदोरक लिद यासम्जैयो।
२ सुए ज़ अर्काए उमिन बलेद
ताएरक। सुस ज़ माइसिद प्राइँस
सहिसिद यायुं भ्यासोर ओतारक।
३ गे ब डादा काता ज़ मासैँन्यार
परमेस्वरए ओपाँ माभैँद तँदा बावर
गेल्यो। गे जोत ब गेयुं मानैधुद गेमन
लागिउ येनर दाद गेजिउ भरी अर्काए
उमीं चाव रँद मी तून्या, सोसिन्या,
हेला रँसिन्या वाज़ गेदोऽयाव। ४ हैदी
ब गेलाई बाँचैऽयाव परमेस्वरए
गेलाई उयुं ओनाव उयुं ओगराँव
सतैँद ओयासिउ बेलाक ज़,
५ अजम्बरी जुनील बान्या जैसिक्वो।
निताव ओजैसिउ गे गेकमैव धर्मए
माःक। ओल परमेस्वरए उयुं
गराँद छैँव उपुरूसए गेलाई सछैँद
साःरोल ओजमैँसिउनी वाज़ गेताके।

६ नो उपुरूस गेलाई बाँचैऽयाव येसु
ख्रीसए ल्योनी परीदद्यासिक्वो। ननी
ज़ गेक्याँत ओअसिकर ब धोल
पोगोल ज़ ताऽया। ७ है जैद गेल्योदा
परमेस्वरए उयुं ओगराँवनी ओडाक
उयुंलाव मितावर गेतावए अजम्बरी
जुनीदा गेयुं थू गेजैऽया।

साचो थोरिउ पाँत लिन्या

८ आव डासरो भरी साचो पाँ
ज़ लिऽया। है जैद नँ नोरालाई
पुर्थस सम्जैव ताके। हो ताकिन
ची परमेस्वरए ओपाँत हुवर चाव
येनत कलँ लिन्या लेर। आव पाँर
गेजूनी थोरिउ चाव ज़ लिऽया। ९ गे
अनाकलाव पाँर, खरडाव मरडाव
काता काताराए मिनर सोनो मोसाए
ओकानुनलाव पाँरानी खर्लेसिन्यारानी
अछतड ल्यो ताके। आव भरी
अनाकलाव याचाहित माल्योर वाज़
लिऽयार। १० निताव पाँरानी फातैऽयाव
मिँलाई तखेप नेखेप पै सम्जैव ताके।
है जैद ब ओमाताकिन नोलाई
रास्द नैव ताके। ११ निताव मिँए उयुं
बिप्यानी तासिउ ओतावए मादान्या
वाज़ दाद ओलनी ज़ पापी थोरिऽया।

तुपैन्या पाँर

१२ डास लिऽयावनी अर्तिमास
सोनो तुखिकसनिलाई नल्योदा तोबो

डानिपरीरिज़्या। नो मिँ उहुव प्राइँना
 नधुकिन डास निकोपोलिसल दैसि-
 हुव ताके। डा युँदा भरी नल ज़
 डालिरिज़्या। १३सरकारी वकिल
 जेनास सोनो अपोल्लोसनिलाई माथैँव
 मायो-वल सघैद चावस निपरींयो।
 १४नलाव गेसकाव मिँराए ब निताव
 माथैँव मायो-वलाई सघैन्या चाव येन

ओपैसिरक। परमेस्वरए ओयेनत काम
 मालागिउर तातारक।

१५डास लिज़्यावराए प्राइँए जेरो है
 दींयार। नल्योडाव लिज़्याव गेलाई
 मया दाज़्याव यायुँ हुबोरालाई जेरो है
 यादोयो।

जे प्राइँए ल्योदा परमेस्वरए उयुँ
 ओय़ाल्क।